

大名府志

671.1400
377
116

咸豐三年鐫

大名府志

府庫藏板

則告雹蝗癘疫則告而境內之人有欲不得償寃不得白者則奔走香火以告視社稷山川殆尤重焉郡城隍在崇禮門以西舊制頗宏麗而風雨之所漂搖鼠雀之所穴罅日就圯壞瑯琊王公來守吾郡始謁廟低徊久之曰是宜修是誠在我越明年丙午捐俸若干緡聚材鳩工擇日起事而郡僚郭君張君陳君捐俸佐之已而元城令顧君捐俸佐之已而州縣守令諸君各捐俸佐之至經營料理則專屬顧君董其事始於某月某日成於某月某日門廡殿寢靡一不周柱石榱桷靡一不飭黝堊丹漆靡一不澤葢不泮

月而廟貌肅然改觀矣先是歲屢旱甲辰之冬復大
冰雪民以無麥癘疫間作而是歲雨暘時若災沴不
生蝗從東北來其飛蔽天過數日夜竟出境去客曰
神人之感應亦甚速矣廟修而盼蠻隨之余曰不然
公之治吾郡也豈止斤斤修文具已哉公之言曰吾
民雖夥不過善惡兩者而已善者不彰何以示勸惡
者不痺何以示懲於是日討章程而訓勅之進三老
孝弟賑其饑乏獎其遜順而閭巷少年有鮮衣怒馬
飲酒陸博探丸攫市借交報讐扞文罔走死地如鶩
者卽豪有力必重論如法輕則貫以三木遍徇於國

中一時州縣長吏皆奉行德意惟謹而民間始知有
爲善之利爲惡之害此其彰善癉惡與神之福善禍
淫若合一券固宜其精氣潛通而休徵畢至也不者
玉石不分薰蕕無別將強凌弱衆暴寡抑鬱結於下
怨讟騰於上而第一土木一祝史之爲兢兢神其享
之乎夫國家張官置吏以爲民也建祠崇祀以爲民
也公以治民事神而神以治民佑公可謂兩無負矣
爲吾民者將何以圖報稱乎寧朴而嗇毋華而靡寧
鈍而拙毋利而巧寧睢睢盱盱爲鹿爲豕毋兢兢逐
逐爲虎爲豺耕田鑿井含和飲醇明不至背公之訓

而幽不至于神之罰庶幾哉長爲太平之民國家尚亦有利也已

創建城隍廟記

陳具慶

城隍之神古未有聞也原其始乃在隋唐之際今京師有都城隍廟而省會郡邑以迨鎮戍凡案土闕地設險以自固者無不祠而祀之蓋卽古者表燬防庸之意以義而起者也令甲諸司初蒞官必齋潔詣祠下陳牲醴誓告於神然後受事嗣是春秋則祭朔望則謁有事乎無祀之鬼則奉神以主之其水旱妖異諸爲民所患苦者皆於神乎籲禱焉至嚴重已吾郡

城隍廟在崇禮門以西其神南面坐堂皇而州邑諸
城隍並列祠兩廡下制甚庠陞邑侯許公顧而嘆曰
郡之有城隍猶其有太守也在州邑則視令長矣令
長以時謁太守退而入其署則據廳事臨見吏民豈
其神也而顧不得崇祀乎是余不佞責也然時絀舉
羸瘠未敢議閱三年政通人和乃屬邑父老而告之
皆曰諾旣與商經費曰募義便於是卜地於學宮之
西南輦土築基庀材召工侯首捐冰俸而紳衿氓隸
以至閭閻筭黛之流莫不競勸共成盛舉凡爲正殿
五楹寢殿五楹東西序各五楹限以重門繚以周垣

表以棹楔功且竣諸父老請余徵言余惟聖人神道設教要使人爲善去惡而已爲善之念有政教率之而未必堅而歆之以神之福之則無不堅者去惡之念有法律繩之而未必力而惕之以神之禍之則無不力者蓋政教法律制之於昭昭人所可知者也顧反以可知而生玩福善禍淫宰之於冥冥可知而不可知者也顧反以不可知而生畏故大其權於冥冥之中以佐政教法律之所不及者則惟神之爲靈而已靈爽有赫豈繫於廟之有無然神必有所依而著人亦必有所奉而嚴廟之也者固所以著之嚴之者

也或曰郡邑同地其爲城若隍者一而已矣神何得而兩之則侯彛者視守視令之說也朝廷旣爲郡而設一守又爲邑而設一令則爲郡而廟一郡城隍又爲邑而廟一邑城隍奚又不可是亦所謂以義而起者矣且令甲麗郡之邑並罷先師之祭而元城猶然祭之人不謂是非也則侯之卜地而必取其近於學宮者其殆有微意乎余故不揣謏陋輒爲之辭以文其碑辭曰惟邑與郡並隸茲土郡旣有伯邑亦有主神於邑者視我令君列祠廡下一席才分許侯顧之喟然而嘆豈繫無祠我輪我奭首捐祿入爲大衆倡

士女嚮風樞載輸將班倭奏功落成不日有恤闕宮
枚枚實實靈爽攸宅民人所瞻聰明正直彰輝惟嚴
俾而四封雨暘時若寇攘屏息疫厲不作馨香肥腴
歲事孔修神之血食億萬千秋

重修城隍廟記

魏允中

今天下祀典甚設惟孔子城隍二祀無遠邇大小咸
祀焉然孔子之道尊尊則人莫敢近歲時冕服者往
章縫者往庶民不往若城隍章縫者往庶民者往往
且多有欲未獲往祈焉曰神能福我有憤未釋往訴
焉曰神能洩我有疾病猶豫未決往卜焉曰神能告

我爲一不善若神之見之言一不善若神之聽之城
隍之爲神固若是乎其靈也惟神故靈惟靈故祀祀
也者聖王所以假神之靈以格天下者也故匹夫匹
婦之愚有賞之所不能勸罰之所不能懼而語之以
神輒思遷善而遠非何者彼其靈固有以格之也然
而不信不靈不享不靈不嚴不靈修者信之享之嚴
之而使之靈者也吾邑城隍廟剏自洪武初年已修
於天順之乙酉再修於正德之癸酉又再修於嘉靖
之乙卯而隘者未拓卑者未崇缺者未備陋者未飾
猶多憾焉今萬歷己卯我念淮公吳侯始拓其隘崇

其卑備其缺飾其陋名之爲修而實乃剗可謂信而
享且嚴矣而有不靈者乎靈而有不格者乎夫孔廟
有修以崇正學城隍有修以警愚俗治教莫大焉者
也是役作於萬歷七年五月二十八日成於萬歷九
年十月十五日旣成里民王國馮二樂王思恭郭仲
仁以記請不佞中遂本公所以修之意而爲之記督
工者前人助工楊可教等仍修正殿寢殿二門撤修
子孫眼光殿兩廊廡添修齋戒廳棊盤衆司數楹皆
記諸左云

重修城隍廟記

蘇民望

長垣城隍廟在邑治之北洪武三年縣丞劉彥昭奉
勅始建之然規制湫隘有司因舊加飭改作未遑休
寧胡侯宥治邑三年值萬歷甲戌年當天子考績之
暇乃捐俸爲鄣具命諸父老夏鋒程宦等董之又出
令曰願與若役者聽於是僚吏縉紳士民之義者爭
輸金助應若響焉前門移內六武外樹以屏絕人神
通二門起層樓五楹左鼓右鐘中供祀醮有誥命樓
移兩門間正中紀事碑左右峙若拱焉至若殿若寢
若廊若垣棟楹榱桷之摧折者蓋瓦砌磚之墜腐者
丹雘之漶漫不鮮者繪像之剝落者皆治之宮外隙

地左鄉約亭右土祇祠故所未有侯以義起之歷秋
及冬工乃訖諸父老以告蘇子適客至而難曰吾聞
凡官於其土者祀典所載皆當飾其祠宇潔其精禋
而時敬事焉非以徼福惟以修其職事焉耳侯貞白
度舉百墜興利除害三年於茲矣覩茲廟亦數數矣
廼今而始修之不其晏歟諸父老曰唯唯有以侯嘗
矢於神曰惟神聰明正直奉天子之命食茲土惟余
弗克肖亦奉天子之命吏茲土惟神與余皆爲民設
者也惟神相余保乂民無負天子之成命爲神羞惟
余舉事有不與民同心者神其鑒之故自始來至今

惟日孳孳務民義若疾病饑渴然蓋先成民而後事神侯之謂矣客曰民神二乎蘇子曰吾聞長國家者有民有神有民是以有生養教道之事有神是以有享賽祈報之典侯政成化行物阜民安不自以爲功而歸諸神故敬事以報之事神亦所以成民也奚其二客曰然則侯亦有報乎曰有夫天子張官置吏以統民神乃時視其殿最而黜陟行焉鄉侯報政於天子天子嘉之令復來又採廷議守令以六年計着爲令而吾垣實自侯始則澤民將益深事神將益虔貞度舉墜興利除害將益大且久他日下璽書勤徵召

如漢室優良吏故事將於侯是加則所以報侯者豈淺淺哉客揖而退諸父老驩然進曰今而後爲理之要幽明之故報施之義俱知之矣請刻石以志不忘萬歷甲戌孟冬

東嶽廟記

輔惟良

滑之北兩舍而遠是爲高陽鄉之什善堂村舊有岱嶽祠莫知興作之由土俗稱舊廟卑陋不足以廻旋金大定四年夏五月赤旱近百日衆口嗷嗷無望有秋父老率衆詣焉香火未收而澍雨浹洽里之人遂改作新廟前後殿宇兩廡臺壯嚴爲一方冠貞祐

兵後惟正殿僅存上漏旁穿日就頽圯皇元中統三年鄉豪吳清李玉葺而新之水旱疾疫祈禱輒應里人事之益恭頻歲祝貴等捐金購材以營建爲事高門之巍然修廊之翼然漸復承平之日咸歌盛事之新落成之日馬榮等請於同知滑州事輔公以歲月記嘗聞神者禮之主也有是禮則有是神夫泰山之神作鎮東方爲五嶽宗長幹旋元化呼吸陰陽不崇朝而雨天下其豐功厚德所以配兩儀而育萬物也按禮經諸侯得祭封內山川季氏旅之吾夫子譏其僭祀典毀壞異說肆行誕妄譸張無所不至流俗昧